

PROGRAM ICE PLATFORM NERANGKA PELUANG PENGAWA PUANG NGAGAI NEMBIAK PALAN PELAJAR TINGGI

12 May 2016

- The Borneo Post Online



NINGAKA PENERANG: Hatta (tiga kiba) mendingka penerang ari seiku pengari kompeni ke bisi muka bansal ba ICE, kemari seraya diperatika Kadim (kiba).

KOTA SAMARAHAN: Program Sector Focused Career Fair (SFCF) UNIMAS innovation, Career and Education Fair (ICE) sebengkah ari chara dikena ngurangka isu raban baru graduet nadai bulih pengawa, di nengeri tu.

Mandal Canselor UNIMAS (Universiti Malaysia Sarawak) Prof Dato Dr. Mohamad Kadim Suaidi madah, SFCF UNIMAS ICE 2016 platform endur meri penerang ngagai nembiah UNIMAS sereta nembiah ari institusyen pelajar tinggi bukai pasal pengawa puang sereta peluang belatih dalam industri minyak, gis enggau karan (OGE); injinir; Creative Multimedia enggau Global Business Services (GBS).

“Tu kedua kali ICE diatur, keterubah diatur taun 2015 lalu nerima sambut ti manah ari raban graduet, taun nyin kemari bisi urung 7,000 iku orang datai ngagai program ICE.

“ICE tu nyadi platform dikena mantu nambahka pelayuh raban baru graduet nengeri tu bulih pengawa.

“Laban nengah ICE tu kami (UNIMAS) nengah kerejasama Talent Corporation Malaysia Berhad (TalentCorp) ngempuruka lebih 50 buah kompeni tauka pengaji muka bansal pemansang lalu bala raban graduet tauka nembiah ulih terus betanya ngagai raban pengaji,” ku iya seraya madahka pengaji mega bisi ngatur interbiu terbuka.

Kadim mansutka pekara nya dalam aum pengarang berita, pengudah nyempulang Chairman Lembaga Pengarah UNIMAS Datu Dr. Hatta Solhi bejadi SFCF UNIMAS ICE 2016, ke diatur ba DeTAR PUTRA, UNIMAS ditu kemari.

ICE 2016 berengkah diatur kemari (11 Mei) nyentuk 12 Mei (sehari tu) ba DeTAR PUTRA UNIMAS, ke dibuka ngagai orang mayuh.

Nambahka nya ICE nyendiaka peluang ngagai nemiak UNIMAS taun tu ke manggai urung 5,000 iku ti udah nembuka pelajar ngiga pengawa ba pengaji ke ngambi bagi ba pengawa pemandang baka kompeni Eegis BPRO, IRDA, GAMUDA, ASTRO, Axiata Group, Ernst & Yong enggau mayuh ke bukai.

Program ICE nya mega meri peluang ngagai pengaji tauka kompeni milih raban graduet ke patut diambi gawa.

Kelimpah ari nya, ba aum pengarang berita ke sama, Diretkor Opis Tenaga Kerja (JTK) Datu August Buma madah, program ICE ke diatur UNIMAS begulai enggau TalentCorp nya amat beguna dikena mantu raban baru graduet.

Iya mega madahka JTK nyendia mayuh program ke sebaka dikena mantu raban graduet ngiga pengawa.

“Program baka ICE tu beguna amat dikena napi penanggul raban baru graduet ke nadai bulih kereja. Tu ulih ngurangka penyampau raban graduet ke nadai kereja.

“Kami (JTK) taun nyin kemari bisi ngatur 17 iti program muka peluang gawa baru ke udah mantu lebih 11,000 iku,” ku iya.

Sama bisi dalam aum pengarang berita nya kemari, head of Malaysian Talent Development – Graduate Employability of TalentCorp, Siti Norliza Mohd Sahar; Dean Centre for Student Development UNIMAS Prof Dr. Siti Raydzah Ghazali.